

Höre/ vñnd sie miteinander den einigen waren GOTT kennen vñnd nennen / ausruffen vñnd ehren lernen / auch mit trost / rath vñnd hülff einander trewlich beywonen / auff das aber Menschliche Gesellschaft desto friedlicher vñnd freundlicher erhalten / vñnd keins vom andern geärgert noch abgewendet werde / So wird durchs natürliche vñnd Göttliche Geseze erfordert / das eins mit dem andern trewlich vñnd aufrichtig / ohne vorthel vñnd betrug handle / darzu auch Ellen / Gewicht vñnd Maß / sampt der Münze verordnet sein / auff das man mit Keuffen vñnd verkeuffen eine gleichheit treffen könne / Des sich Abraham / Isaac / Jacob / Joseph / David / Salomon / Lydia die Purpurkrämerin vñnd viel andere Gläubigen im alten vñnd neuen Testament in Gottes furchte trewlich beflissen haben.

Das aber Sprach der weise Mann Cap. 27. spricht: Wie ein Nagel in der Mawren zwischen zweyen Steinen sticket / also sticket auch Sünde zwischen Keuffer vñnd Verkeuffer / vñnd S. Mattheus meldet: Cap. 21. Das der HERR Christus Keuffer vñnd Verkeuffer aus dem Tempel getrieben habe, Damit wird auff den Mißbrauch gezeiget / dafür die Schrift fleissig warnet. Proverb. 20. Mancherley Gewicht vñnd Maß ist beides Grewel dem HERRN. 1. Thessal. 4. Niemand greiffe zu weit / noch vberfora theile seinen Bruder im Handel / denn der HERR ist der Reche vber das alles.

REGVLA ALLIGATIONIS.

Das ist die Regel / dadurch man mancherley Wein / Würke / Münze / vñnd andere dinge gleichwirdig zusammen setzen / vermischen / vereinigen / verkeuffen / oder verbeuten kan. Wie solchs durch folgende Exempel erkleret wird.

Von den Ismaelischen Kauffleuten
in Josephs Historien.

Genes. 37.